

# YEMISI MA UVANTEIN BOMPON MINO

## (Yemisi)

**Yemisi Vompon Ma Uvanteí Pákenai Afova Vaya Ino**

**Ma vompon ma uvantein banta ino.**

Yisasin afá ma Yerusaremi barurá báken ma mumunan kayoi ánon bantaí ukhá ein banta Yemisi ino.

**Uvarein orana ino.**

AD foti-fai (45) ráké foti-naini (49) ráké mai aúban mino. AD foti-naini (49) fin Kanisori átaru fákakhan mino. Maí damú ma ákonaen tikharé ein baya kayo ída ma vompompin uvanten mino.

**Ma vompon ma uvantein baru ino.**

Yerusaremi kákan barurá inon ten iniyan mino.

**Ma vompon ma uvaman amikhein kéká ino.**

Yutan monó nanin banta ano ma Parestainí bara me ampiren ma karan orera ukhá ein kékái amikhen mino.

**Nái ana vará ma vompon uvanten nafino.**

Esé arái in bompon ma uvanteimpin Yutan monó nanin banta ano Tiyaarafenui man baya ánain puntáden bákurino van ákona uantiyan inká uman erintin ma mantaan ákona inain bayan afova amikhen mino. Yisasi ma anuyontá monó baya siameiníen mi Yemisi ano monó tin avúavá ma ara ara aa ma vain mi monó nanin banta siamikhen mino. Máan ma in manon monó tin avúavápin mumunan mano kama yoran afoká iyan ne sen aní ukhen mifo mumunan manon kantasí ukhé uno ma sin mano ída ino.

### Yemisini Amusin Baya Ino

**1** <sup>1a</sup>Tiyarafenu vá Bafan Yisas Karaisin máí ída miyan baran doran banta séi Yemisi anon ma vompon uvaré uno. Mai ma siyan mikan mifo sirantan kan orun kádan (12) anan kéká ma Yutan barafin bain pinté ma ena varafá meren mana mana ukhein pimpái ma vompon uvamádékun oreraen mino.

### Akhenókain Mano Ma Mumunan Maman Ákona Iyain Baya Ino

<sup>2b</sup>Mumunan tiyofi sífá tiváeyan noe, uman mano ma siretin amaniná ma yákó intiya mai van amusin mana in daná ino vá te afová ono. <sup>3c</sup>Mai fara vara seyo, siretí ankani mumunan ma akhenóka uan onan nain manon tiretíi mumunan moéken ákona uantantiya mantaan ákona in nono. <sup>4</sup>Máan tukhen mifo áin ná mai avúavá ano orun potino. Para vara seyo, máan avúavá ano ma fara oriyan báken mi siretíi mumunan pura sen ákona uantantiyan akhenókafin ída erave ankamin nono.

### Amúkin Avúava San Ma Siamein Baya Ino

<sup>5d</sup>Tiyarafenu ano ma varano sikhein daná ma afová ono van ma in nain mano vá mai ma uman nan ída ininton amusin iyáken amiyain Tiyarafenun inaesin ná amino. <sup>6</sup>Máan tukhen mifo véin ma ina ono sinteya vá mai véi simintéi ina iyá uno siyákeya vá ina ono. Para vara seyo, kokhon ineine ma iyain kéká ano mai ma uva ano ma non karantó ein an mi yiyan mino. <sup>7</sup>Máan avúaváká ma van nain nanin banta ano ída vá Bafan mano mana yaná timintéi uno siren ineine ino. <sup>8</sup>Máan kékái ineine ano mo asuse ukhantin pasen beti ma varan nain danasinta ano non ma karantó en onóbe enóbe ein an manan danten mino.

### Ona Ída Van Kéká Bá Kokhon Ona Van Kéká Báí Vaya Ino

<sup>9</sup>Mumunan kéká ano ma minó dana san o afasí ma iyanten ná amusin ino. Para vara seyo, Tiyarafenu ano máan kékái kákan bí amiyain mino. <sup>10e</sup>Inká mai ma minó danasinta ma kain bain kéká ano amusin ná ino. Para vara seyo, Tiyarafenu ano máan kékái oman bararasí urantin mi katafin ma vain paravan mano ma mo khafureiní inten mino. <sup>11</sup>Para vara seyo, áau édaven ma ákonaen á kan maen mai ma kamaen kiyaré ein paravan mano ma ainen mo kafuré iyain an mi yen mai ma kokhon ona ma kain bain kéká ano vetí ina yanasinta vá ainen o aiyoranten mino.

### Minó Kama Yanasinta Ma Eriyain Mai Tiyarafenun Pinté Ana Ino

<sup>12</sup>Mai ma akhenóka iyákan ma maifin mantaan ákonaé iyain kékái Tiyarafenu ano avábá uanté iyan mino. Para vara seyo, maifin ma

<sup>a</sup> 1:1 Mat 13:55; Apo 15:13; Kar 1:19; 1Pi 1:1    <sup>b</sup> 1:2 Rom 5:3-5    <sup>c</sup> 1:3 1Pi 1:7    <sup>d</sup> 1:5 Pro 2:3-6    <sup>e</sup> 1:10 Ais 40:6-7

mantaan ákona ukharé inain manon mai ma Tiýarafenurá ma anunu ukhein kéká ma aunan bain kamamó iyáantan ma vain baranten mino. <sup>13</sup>Inká akhenókafin ma orivinona ano ída vá tiyákeya Tiýarafenu anon téin akhenóka uan oniyán mino seno. Mai fara vara seyo, Tiýarafenu ano namu avúavá barano van mana ano ída véin akhenóka uan ontein bantin béi ano ída kanafen banasi akhenóka inten mino. <sup>14</sup>Máan té iyan mifo setin tirá mantá ma siran niyaruna yaná anoi akhenóka in avúavá maman dákó iyá tiféuno. <sup>15</sup>Mai ma akhenóka in avúavá ano ma éimpin afoká uven e yarifaáda ma umeí iyaona anon purin maman dákó é iyan mino.

<sup>16</sup>Máan tukhein nan mi mumunan tiyofi sifá tiváeyan noe, ída vá áesin kampun baya fóké tiretin do aviren tavifá orino. <sup>17</sup>Ayompin báken kano van ma oon kayo uvamádan ma vain danasinta Afóe Tiýarafenu vaipákéi kama yanasinta ano eriyákan béi ída aman mano ma onóbe enóbe einí é iyan mino. <sup>18</sup>Bei fura vaya fókéi setin maman be akhafanaí uren minó danasinta ma uvantein amanináí setin esesí urá bá tiféuno.

### **Baya Iniren Ma Mai Ánain Dakhafen Doran Baya Ino**

<sup>19</sup>Mumunan tiyofi sifá tiváeyan noe, minó baya ma sin nain kama e inireya ída vá aine vaya siyáke vá aranan ono. <sup>20</sup>Para vara seyo, aranan ma in avúavá ano ída kanaíeya Tiýarafenu ma anunu ukhein avúavá maman dákó inono.

<sup>21</sup><sup>h</sup>Máan tukhein nan mi namu avúava sinta ma siretin aúpin ma van nará pédeya Tiýarafenu ano ma vei vaya siretin aúpin doádan bain ná kama ureya mai ánain dakha fono. Para vara seyo, mai ákona anon kanafen tiretin aya uren purin pintena evaránen aviranten mino.

<sup>22</sup><sup>i</sup>Máan ma ukhein nan ovare vá me ineno. Mai vaya kayo ánain dakhafano van mi siamiyan mifo iniya ana vano va raino. Ída ma mai vaya kayo ánain dakhafinteya mai eyantái óen banta an daveya eyan mi máka siya va ono. <sup>23</sup>Para vara seyo, vaya ana inire ma ída mai ánain dakhafinte mae mai kamufin ma siretíi auná onein an diya ono. <sup>24</sup>Tiretiyan ódareya ma oren nan maen manádái áuné iyan mino. <sup>25</sup><sup>j</sup>Máan tukhen mifo mai ma ume finte ma Tiýarafenui funtákein man baya ano ma útúantaya ma vaona ma oman afova suron ureya ma mai ánain dakhafiyáke ma inká mai ma ineona vaya ma ída áun esin maen mai van Tiýarafenu ano avu uantanten mino.

<sup>26</sup><sup>k</sup>Monó nanin banta uno sire ma siretí ankan amafintá ma ída yafisinte mae mai siretiyantái óen banta an daveya eyan mák mááká esin mi siretíi monó tin mo asuse en beni nan aran ída vanten mino.

<sup>f</sup> 1:18 Yon 1:13   <sup>g</sup> 1:20 Ekr 7:9   <sup>h</sup> 1:21 Kor 3:8; 1Pi 2:1   <sup>i</sup> 1:22 Mat 7:26; Rom 2:13

<sup>j</sup> 1:25 Rom 8:2; Yem 2:12   <sup>k</sup> 1:26 Íbo 141:3

27Teti Sifóe Tiyaafenun avorá ma fura sen monó nanin bantaí ukhé bano ma sinte vá aso iyamporinta vá inká baré nanin kayo vá ano ma umampin bantiya vá betin aya iyákeya ída vá áesin ná ma varákena yanasinta ano setin máden asuse ino.

### Aronará Ana Ma Kama Iyaí Pákena Van Ma Sikhein Baya Ino

**2** <sup>1</sup>Mumunan tiyofi sifá tiváeyan noe, manáa kayo van mana anunu ureya ma ena kéká oyan amiyáke mae mai inte ana vará teyá tetisi kakhakhein Bafan Yisas Karaisintái mumunan ukhé uno siya rafono.

<sup>2</sup>Tiretíí átarufin ma mana vanta ano kama ukhein auí daná bá kákan miyantá bain ankaroro vá uren erintin ma inká ena vanta ano yáka ráka ukhein auí daná ma uren erinti ma <sup>3</sup>kokhon ona vain banta van tiamesin kama karáká kumamintiya ma inká ona ída vain banta van ma mesapá o mantakheya vanó tinte fo áa varará kumanenó tiyanteya fo mai <sup>4</sup>siretí ankan mi yaimin bantíi uveyan tiretíí namu ineine fóké banasi yaimiya ono.

<sup>5</sup><sup>m</sup>Mumunan tiyofi sifá tiváeyan noe, ma vaya vá ineno. Ma varafin ma ona ída vain nanin banta van mi mumunampin moéken kákaní inten ne sikhen mino. Mai kéka anon mai ma Tiyaafenun anunu iyain kéká ma iyáantan bain dafisimpin orintéin aní ukhen mino. <sup>6</sup>Máan tukha ompo siretí anon mai ma ona ída van kéká ayave amiya ono. Kokhon ona ma vain kéká anon tiretin nina yaná máden asuse uren avían kópin kaiyan mifo mai van ídá afová intoyá kama iyá ba rafono. <sup>7</sup>Mai ma Tiyaafenun ano ma Yisas Karaisini kama ví ma maman tiretin amaniná ma kaein banta mai vetí ankan manon oyampá baya sein mino.

<sup>8</sup><sup>n</sup>Mai fura ino. “Eyan nan ma anunu iyaonaí e vá ena van anunu ono”

*Riv 19:18*

sikhein man baya ma Tiyaafenun vompon dókifin bain ánain ma fura se vákurinte maen pura yanasí inono. <sup>9</sup><sup>m</sup>Máan tukhen mifo mai ma ona vain kékái vaya ánain mana ma yakhafinte mae mai man bayan durafúde umeí eono.

<sup>10</sup><sup>p</sup>Para vara seyo, iye anó minó man baya yakhafiyáken ná mai fintena mana man baya yurafurinten nafi mai Tiyaafenun minó man bayan durafuren mino. <sup>11</sup><sup>q</sup>Para vara seyo, mai Tiyaafenun ano anan temi, “Ída vá pamúku avúavasí ono.”

*Eks 20:14*

Inká ena máa sikhemí, “Ída vá banta aruan purono.”

*Eks 20:13*

Máa sikhanti ma sireti ma ída famúku avúavasí iyáke ma vanta aruan purinte mae mai man bayai yurafure ono.

<sup>1</sup> 2:1 Apo 10:34; Yem 2:9   <sup>m</sup> 2:5 1Ko 1:26-28   <sup>n</sup> 2:8 Mat 19:19; Kar 5:14   <sup>o</sup> 2:9 Diu 1:17

<sup>p</sup> 2:10 Riv 19:37; Nam 20:7-12, 24; Mat 5:19   <sup>q</sup> 2:11 Rom 13:9; Diu 5:17-18

<sup>12</sup> Māan tukhantiya vaya ma sin nona fi áa náí avúavasá barante fo mai ovare vá me ineno. Mai ma avábá bain man baya ano ma ume fintena utúantaya ma vaona anoi kó tiantanten mino. <sup>13</sup> Mai fara vara seyo, ena nanin banta van ma ída arunan uantiyaré esin maen Tiyarafenu ano éin ída arunan uantanten mino. Māan tinten mifo ena van ma arunan uantiyaré esin maen mi Tiyarafenui arunaná ano vei kó pintena siretin ampiantanten mino.

**Mumunan Mano Ma Kama Avúavá Ída Maman Dákó  
Inten Maen Mai Mumunan Púken Mino**

<sup>14</sup> Mumunan tiyofi sifá tiváeyan noe, siretíí avúavá ano ma ída kama ukhantiya mai náí ana vará teyá tetí ankan mumunan ukhé tiféuno siya rafono. Māan mumunan mano ída kanaíen mana nanin banta aya urantin Tiyarafenu ano aviranten mino. <sup>15</sup> Afá aváe ano fi áa ayofi ano fi ma yunan má aúí daná ba san ma iyantiya ma <sup>16</sup> mana yaná ída aminton ma inka ino múmúká bákeya kama e yunan niyasín ná Tiyarafenu ano avábá uantano ma sin nona ano mana kama yanasá maman dákó inte fonon.

<sup>17</sup> Māan tukhanti afovasá ono. Mumunan iyáken ma kama yorarí in avúavá ma ída vantín maen mai mumunan mano mo faen danasí en purein an mi yakhen mino.

<sup>18</sup> “Manáa ano kokhon ineine uren máa sé iyan mino. “Manáa kéká ano kama mumunan má bákan maen inká ena kayo ano kama yorarí in avúavá bá ban mino,” siya ompo séi siretin tiamenté uno. Tiretíí kama yorarí in avúavá ma ída vantí maé tiretíí mumunan ída onanté umpo sesi kama yorantái sesi mumunan aní ékuya onan nono.

<sup>19</sup> Mana Ayarafenu anan ban minó tireya siretí ankan mumunan iya rafono. Mai fura ino. Namu aunan kayo vá ano yeren mumunan iyáken avinantampin ban mino. <sup>20</sup> Tireti óen banta kayo oe! Kama yorarí in ma ída vain mumunan mano ma mo namuen asuse ukhein mai inte yamusá afová inte rafono.

<sup>21</sup> “Teti sinafu Abaraamu ma ve anin Aisakin ma on kará nará uádantá ma Tiyarafenu íkun uan amein avúava san ma Bafan avorá puntákein bantae ma sikhá ein nan ídá ovaré me iniya rafono. <sup>22</sup> “Tiretí ankan afovasá ono. Beni mumunan má kama yorarí in má ano manafiní uven doran mi veni mumunan mano mo fura yanasí en mino. <sup>23</sup> “Māan tukhan mi Tiyarafenui vompon dókifin ma varé ein bayai mo khañen mino. Mai vaya ano máa sikharen mino. “Abaraamu ano Tiyarafenuí mumunan uran mi véin maman puntákein banta e siran,” *Esé 15:6* banasi ano yere véin nan Tiyarafenui kama arona e sen ariyaren mino. <sup>24</sup> Māan tukhein nará afová ono. Mumunan mana ma in mano va

<sup>†</sup> 2:12 Kar 6:2; Yem 1:25; 1Pi 2:16    <sup>\*</sup> 2:13 Mat 5:7; 18:32-35    <sup>†</sup> 2:15 1Yn 3:17    <sup>“</sup> 2:18 Kar 5:6    <sup>ˆ</sup> 2:21 Esé 22:9-12    <sup>ˆ</sup> 2:22 Ibu 11:17-18    <sup>\*</sup> 2:23 2Kr 20:7; Ais 41:8

Tiyarafenu avorá tetin maman puntákein nanin bantaí iyan naifo setisi kama yoran má ano yeren máan té iyan mino.

<sup>25</sup>ʷPamúku nanin Reapin má dere anon mai avúavá tetin aní ukhen mino. Afurin banta kéká ma avían aúpá kaúdákaren ma sianta ena aí páké uaren ma evaránen orein avúavá anoi Tiyarafenu avorá puntákein naninfen mino. <sup>26</sup>Kama yorará in mumunan ma ída vantín maen mai mumunan mano furein an mi yakhen mino.

### Oorá Ma Yafisin Baya Ino

**3** <sup>1</sup>Mumunan tiyofi sífá tiváeyan noe, monópin ma vanasi afova amin nanin bantaí ono van kokhon mano ída vá ono. Mai fara vara seyo, vanasi ma yaimin damú ma afoká intin maen mai ma afova amin nanin bantaí ukharé inain kékái Tiyarafenu ano umantá daiminten mino.

<sup>2</sup>Tetí minó ano kokhon dádái namu avúavápin eravé tinkamé iyá tifé umpo intéa kéká anó oorá dafisinten nafi mai kayo anon monó avúavápin anoní ukhen pasen be aurá kamaen dafisinten mino. <sup>3</sup>Osin maen kákan tafúna ifo sító aenifó ma véin oofen damurákei kasae o amáe e amáe iyasín eni anunu ánain dakhafinten mino. <sup>4</sup>Inká sipirá dere vá afová ono. Mai maen kákan daná bantín inká kákan uva iyáken o mamáde e mamáde iyantín mifo sító danka ano ma o mamáde e mamáde ma inaintá anan orinten mino. <sup>5</sup>Máan manan en mi amafin mano yere sító danái van mifo kasaen kákan dana maman namu uádanten mino. Inká títóká karé uvin nain ira ano kasaen kákan aafan kanten mino. <sup>6</sup>ʷAmafin ma vain mai máan mana en mi ira ma khiyain an dakhen pasintín namu vaya kayo ma amafintá báken maen kasaen tiretíi kumanin máden asuse uren tireti ma kama e vaona mai ira anamuná ano ma e khen orera einíen kákan uman o maman aminten mino. Para vara seyo, mai ma uman baren berai siyan purín barufin ma ume nanin banta máden asuse iyain ira ma eriyain mai Ban Anon pintéi eriyain mino.

<sup>7</sup>Banasi ano kasae ara ara osafáe fi nun kayo fi safúna kayo fi inká noyana kayo fi máde ayuní inono. <sup>8</sup>ʷMáan tin nampo mana ano ída kanaíen amafin ayuní inten mino. Maifin mi namu vaya kayo víkakhen maen mai ano vanta ma aruan puriyain uvá an mi yakhen mino. <sup>9</sup>Máan tukhan mi mai simafin mano manáa yamú tetisi Bafan Tifóen aví daní iyáken maen inká manáa yamú mai ma Tiyarafenu ano ma ve avúaváká ten ma uvamádan bain nanin banta vá asiren ankayan té iyan mino. <sup>10</sup>Kama vaya kayo vá namu vaya kayo vá ano mana oofentéi khuviyan mino. Máan tiyain nan mi mumunan tiyofi sífá tiváeyan noe, máan avúavá ma variyain mai ída funtáken mino. <sup>11</sup>Non mantein pinté ma vimpun édé iyain mai kama non má íta non masá manafin édé iyan

ʷ 2:25 Yos 2:1-21; Ibu 11:31    ʷ 3:6 Mat 12:36-37; 15:11, 18-19    ʷ 3:8 Rom 3:13

nafino. <sup>12</sup>Inká kanaíeyá fíki yaa ana fintena orifi aran kúdeyá inká uvaini anan tákena fíki aran kúдите fono. Ida ino. Máan tukhantiya un non ma mantan nain pintena ída kanaíeya auyen non dafin nono.

### Kankánan Afova Van Ma Sikhein Baya Ino

<sup>13</sup>Máan tukhein nan mi kama ineine vanti ma Tiyaarafenui avúavá ma afová ukhanteya mai kama avúaváká basin ná tiretin pinté kama avúavá ano non ma vanaein an dano. Kama avúavá ma variyan nonará ma ída au khákan inte mae mai fura seya kama ineine vain kékasí in nono. <sup>14</sup>Máan tin nompo eyan nan mana in avúavá bá inká ena ará namu uantan má ma siretimpin bantiya mae mai fura sen namu uron ukhen mino. Máan tukhen mifo mai van ída vá tiretiyan amo se vá tetin túpin kama ineine vá uno sireya fura vaya me oyan ameno. <sup>15</sup>Mai ma veyan nan mana in avúavá bá inká ena nanin banta ma inian namu uantan má ano Ban Anon pintéi eriyen mifo ída Tiyaarafenu finté eriyen mino. <sup>16</sup>Para vara seyo, veyan nan mana ma in avúavá bá inká ena nanin banta ma inian namu uantan má ma vaimpin ma onesin maen namu avúavá ana variantin minó daná ano mo asuse anan inten mino.

<sup>17</sup>Máan tinten mifo mai ma inaru fáké erikhein afova ma mantein kéká ano ma esé araíen baran nain avúavú máan mi ukhen mino. Avusese ukhen ban má ará kusin avúavápó ma ena anunu in má minó damú ma vempáké kusen ban má ino. Inká ena nanin banta vá ma manafin ban avúavá bá inká ena van arunan uantiyáken kama avúavá ana variyan ma van má mino. Inká aronará ana ída kama iyan ban avúavá baren ma fura sen afoká in nain baya ana ma sin má ino. <sup>18</sup><sup>b</sup>Mai ma ará kusin avúavá ma maman kaiyain kéká ano ma ará kusin danayun ma yóden maen puntákein avúava sintan duyasinten mino.

### Tiyaarafenu Ádé Ma Orin Baya Ino

**4** <sup>1</sup><sup>c</sup>Nái yaná anó tiretin aúbaná aruve asive in avúavá maman kaiyan nafino. Namu avúava san ma aran nan daná anó maman aruvin banta kéká an daren ná tiretin aúpin aruviyan nafino. <sup>2</sup>Tiretí ankan ma anunu iyaona yaná barano van maeya mai ma yan bain kéká aruan pureya inká oyampá baya seya inká aruve asive eya iya ompo mai yaná ída variya ono. Para vara seyo, amúkimpó ída Tiyaarafenu vaípa inantiya rono. <sup>3</sup>Inká Tiyaarafenu vaípa ma inanten nan maen ída amé iyan mino. Mai fara va ino. Tiretíi avúavá ano namu ukhan pasen mi amintiya yan bukhafa ma amusin amintá do maman karúdanona van mino.

<sup>4</sup><sup>d</sup>Tiretí ankan pamúku nanin banta an den non kéká ompo ma vara rákena avúavá ma aronaí in avúavá ano ma Tiyaarafenui namuro vain mai

<sup>b</sup> 3:18 Mat 5:9; Ibu 12:11    <sup>c</sup> 4:1 Rom 7:23    <sup>d</sup> 4:4 Rom 8:7; 1Yn 2:15

siretí ankan ídá afová ukhe rafono. Ma vara rákena avúavápin amusin doseno van ma inikhanteya mai ída kanaíeya Tiyarafenui arona vanonái siretin evaráné tiamiyá uno. <sup>5</sup>Tetin nan Tiyarafenurá ákona inin kaúden bano van ma vei Kantá Aunan túpin kain bain nan ma Tiyarafenui vompon dóki ano sikhein nan mai siretí ankan ná inin ná bariya rafono. <sup>6</sup>Tetin nan mantaan ákona uven namu yana san ma anunu in avúavá bá aruvín non tiren mi Tiyarafenu ano moékan tarisari simiyan mai van mi Tiyarafenui vompon dóki ano máa sikhen mino.

“Au khákan ma iyain kéká Tiyarafenu ano namuroí iyan mifo veyan ma maman bararasí iyain kékái sarisari amiyán mino.”

*Pro 3:34*

<sup>7</sup>Máan tukhen mifo Tiyarafenu avorá eyan maman bararasí ureya váke vá Ban Anoni avúavá oyan amesin ná tiretin me ampíren orino. <sup>8</sup>Tireti ma Tiyarafenu ádé ma oresin maen Tiyarafenu ano siretin ádé erinten mino. Tiretí ume kéká ompo ayan tesé e vá inká baya sireya ída varan kéká ompo aúpin ná avové ure sesé ono. <sup>9</sup>Ída funtákein avúavá ma vare ona vará ífí diyákeya moékan arunaná bariyáke ída vá intireya amusin iya vá bempáké arunanápin ná bano. <sup>10</sup><sup>h</sup>Bafan avorá ará bararasí ureya váke ma veni ákonará ana vano van ma esin maen béi ano siretin maman daní uren kákan bí aminten mino.

### **Ena Nanin Banta Ma Yaimí Pákena Vaya Ino**

<sup>11</sup>Mumunan tiyofi sífá tiváeyan noe, ída vá ben namu vaya sin maran ono. Ená oyampá baya sinte fo áa yaiminte fo mai ano man bayan oyampá baya sireya yaimin nono. Man baya ma yaiminteya mai man bayará ída yafisiya ompo véin mi yaimin nono. <sup>12</sup><sup>i</sup>Man baya ma uvantein Tiyarafenumpin mi ákona vantín tetin daiminten mino. Beyafín mi vanasi ma evaránen aya uren aviran ákona vá aruren asuse in ákona vá ban mifo siretimpin intéa ákoná bákayá ben daimin maran iyá ba rafono.

### **Inurantena Yanasan Ma Ve Amo Sí Pákena Vaya Ino**

<sup>13</sup><sup>j</sup>Máan tiyan mifo afova sá ono. Manáa kéká ano siyáken maen “Taréa fi áa inuran nafi e manté mana kákan barufá orivé maé mairá mana oranará báké manáa yoran kauré maé kokhon aman moní uvaranté uno,” siyan mino. <sup>14</sup><sup>k</sup>Inuran ma afoká in nain danasinta siretí ankan ída uron mi afová ukha ono. Para vara seyo, sireti ma vaona ano non ayo ano ma sító máará afoká uaren ma ainen mo aiyoré iyain an mi yakharono. <sup>15</sup>Tiretí ankan máan ná teno. “Bafan mano ma setin nan mai avúavá barano ma sintí mai ída furin para váké mai avúavá baranté tiféuno.”

<sup>e</sup> 4:6 1Pi 5:5   <sup>f</sup> 4:7 Efe 6:12   <sup>g</sup> 4:8 Ais 1:16; Sek 1:3; Mar 3:7   <sup>h</sup> 4:10 Yop 5:11; 1Pi 5:6  
<sup>i</sup> 4:12 Rom 2:1; 14:4   <sup>j</sup> 4:13 Ruk 12:18-20   <sup>k</sup> 4:14 Íbo 39:5, 11; Pro 27:1

<sup>16</sup>Mai ma varano van ma iyaona yanasintará ma e amo siya varé esin maen mai ano namu avúavá anan mamádantiya uméi in nono. <sup>17</sup>Tiretí ankan afova sá ono. Mai avúavái varanté uno seya afová ure ma ída varante mae mai uméi in nono.

### **Kokhon Ona Ma Yan Bain Kayo Ano Ma Uman Baran Nain Baya Ino**

**5** <sup>1</sup>Kokhon ona ma yenan bain nanin banta ano ma vaya vá ineno. Akhokhofarí ukhein uman kayo ma eriyain nará ifí diyáke aí pinte sá kákan berai seno. <sup>2</sup>Tireti ma kama yanasinta yenan bain mano mo avóken tonton arukhan inká kama vuí danasinta antan danú ano nakhen mino. <sup>3</sup>Tireti ma yenan bain kori vá siriva vá ano mo namuen karokharoní ukhen mino. Ma vara ma kípan nain damúi mai ma kama yanasinta ma kaiyá inona anon tiretí avúavá daíden maen ira ano ma kheíní inten mino. <sup>4</sup>Para vara seyo, mai ma siretí ankani yorará iyákaya ma ída kama e miyaní into ma manáa moní do maman kaiyá eona ano siretí mai avúavá inka siamíkan minó ákona ma vain Bafan mano inikhen mino.

<sup>5</sup>Ena ena yamú tiretí ankan kama namumpin bákeya kama yunan kayo ana niyáke kama inorará ukhaona inka arinti furin nono. <sup>6</sup>Mai ma kama kéká báken ma siretin ída aroren ukhein kayo yaíde mae aruan purono sireya aren nan puriyaren mino.

### **Ará Kusin Má Báken Ma Uman Baran Baya Ino**

<sup>7</sup>Mumunan tiyofi sifá tiváeyan noe, afová ukha ono. Dunan doran kéká ano vara finté danayun orun ampamaren karavintí duyaseno van ma a san ave é iyain an deya vá ará kusin má bempáké báke vá Bafani erin ave ono. <sup>8</sup>Tiretí ankan ará kusin má bákeya mantaan ákona ukhe vá bano. Para vara seyo, Bafani erin inka ádé ukhen mino.

<sup>9</sup>Mumunan tiyofi sifá tiváeyan noe, Tiya rafenu ano siretí avúavá daíden uman amin nafo ída vá eraran aveantumpin baya sin maran iya vano. Mai fara vara seyo, mai avúavá ma yaíden uman amin banta ano inka ereno van iyáken onará mantakhen mino.

<sup>10</sup>Mumunan tiyofi sifá tiváeyan noe, afovasá ono. Mai ma Bafan aviká ma kama avúavá bariyáken uman o yosiyaré ein sakhanampa vanta kayo anon tetin aní ukhen mino. <sup>11</sup>Mai ma kákan umampin o fékein kékái kákan bí amiyá tiféuno. Mai ma Yopun amaniná afoká in ma varein avúavá ano ma Bafani ineine ma kanaí ein manon tetin aní ukhen mino. Para vara seyo, Bafampin mi moéken avábá in má arunaná bá bíkakhen mino.

<sup>1</sup> 4:17 Ruk 12:47    <sup>m</sup> 5:2 Mat 6:19    <sup>n</sup> 5:4 Diu 24:14-15    <sup>o</sup> 5:5 Ruk 16:25    <sup>p</sup> 5:7 Diu 11:14;  
Yer 5:24    <sup>q</sup> 5:8 Rom 13:11-12; 1Pi 4:7    <sup>r</sup> 5:11 Eks 34:6; Yop 1:21-22; 2:10; Íbo 103:8

<sup>12</sup> \*Máan tukhen mifo mumunan tiyofi sifá tiváeyan noe, ída uron ná inaru fi vará fi áa manáa yanasinta fi aví tireya vá pura ódino sire ayan befíyó ono. Para vá eyo seya ída inó se iya vá mairá ída uman barano.

### **Mumunan Nanin Bantai Amúkimpin Ma Ákona Vain Baya Ino**

<sup>13</sup> Tiretin pinté ma uman baren oriyan ban nain mano vá Tiyaarafenun amúkuan amino. Inká amusin ma iyan nain mano vá Bafan anédó diyáken ben aví daní ino.

<sup>14</sup> \*Tiretin pinté ma aí iyantin ban nain mano vá monó doran banta kayo arantin ná Bafan avíká mai kéká ánontá uveri vanaren amúkuantano. <sup>15</sup> \*Mumunan má ma amúkuantan nain manon betin aí daná kípaaantá dantin mi Bafan mano evaránen betin kama uantanten mino. Inká mai kéká ano ma umeí ukharé intin maen Tiyaarafenu ano vetíi ume ampiantanten mino.

<sup>16</sup> Máan tukhein nará tiretíi ume van sirun noe sin maran ná iyáke vá ben amúkuantan maran esin ná Tiyaarafenu ano aya ino. Puntákein nanin banta ano ma amúkiyaimpin mi moékan ákona van mino. <sup>17</sup> \*Tetin an dakhein bantan Iraiya varen mi á ída yano van ákonaen amúkin mi kanú manaú orana ifo afápá mana un kádan biyontá ída á den mino. <sup>18</sup> \*Máan tukharéin maen inká evaránen á dano van ma amúkin ma á eran maen dunan má káta vá ano evaránen orun póten mino.

### **Mumunan Ma Me Ampikharé Ein Ma Ayaintin Ma Evaránen Mumunan In Baya Ino**

<sup>19</sup> \*Mumunan tiyofi sifá tiváeyan noe, siretin aúbanáké ma manáa kéká ano Tiyaarafenui fura sikhein baya ma me oyan amiren orikharé intin ma ovaránen aviádanti ma erinti mae <sup>20</sup> \*mai vá afová ono. Mai ma o aviáden nan ma erein banta anon mai ume vantai furin pintena aya uren nan mi Tiyaarafenu ano mai vantai ume kayo ampianten mino.

\* 5:12 Mat 5:34-37    † 5:14 Mak 6:13    ¤ 5:15 Mat 17:18-20    ¥ 5:17 1Ki 17:1; 18:1

ˆ 5:18 1Ki 18:42-45    × 5:19 Kar 6:1    ¨ 5:20 Pro 10:12; 1Pi 4:8